

Un hault arbre sans branches secq,
Tout contremont regarderas,
Un petit enfant y verras,
De drappeaulx est enveloppez,
Plain de meschief et de durtez ;
C'est le fils Dieu, beau fils, sachiez,
Qui la mort pleure et les pechiez,
Qui par mon grant pechié venront,
Et la paine qu'ilz souffriront
Et la douleur et la grant paine
Que souffrira nature humaine,
Et tout par ma grant mescheance
Et par ma desobeysance
Que je feiz du conseil ta mere.
A Cherubin diras: 'Mon pere,
Qui tant a envers toy mespris,
M'a à toy droit icy transmis,
Commandé m'a que je te dye
Que forment lui desplaist sa vye,
Cy ne se veult il plus tenir,
A ton plaisir vouldroit finir.'
Lors ly enfant Seth s'en tourna,
Mais assez tost il retourna,
Car tant trouva nouvelletez,
Joyes et souverainetez
Que à son pere si s'en vint ;
Trois foiz ala, trois foiz revint,
A la tiercee tout assouvit,
Tant va avant que l'arbre vit,
Où l'enfant enveloppez estoit,
Qui moult ploroit et lamentoit,
Les larmes qui de lui issoient
Contreval l'arbre en avaloient.
Adonc regarda l'enfant Seth
Tout contreval de l'arbre secq ;
Les rachines qui le tenoient
Jusques en enfer s'en aloient,
Les larmes qui de lui issirent